

摘藻堂四庫全書薈要

集部

欽定四庫全書薈要

集部

御選明詩卷九十五

詳校官原任主事_臣李斯咏

欽定四庫全書薈要卷一萬八千五百九十五

集部

御選明詩卷九十五

七言長律

劉基

憶山中

句曲峯高倚太陽，不風巖谷自清涼。
四時嵐彩霏瓊雪，百道泉流湛玉霜。
雅稱采芝追綺季，尤宜散髮學嵇康。
龍鱗璀錯松當徑，鳳尾離離竹過牆。
月上海門蟾早覺，



露寒天宇鶴先嘗
仙人卓劍降魑魅
道士書符禁獠狂
寶氣丹光生夜寂
黃精白朮引年長
茅君虎臥瑤壇上
蕭史鸞棲碧殿旁
桂樹寒山違謝客
桃花流水憶劉郎
猿猱任占青羅帳
薜荔從生綠石牀
世難有身空自累
詩成無鴈倩誰將
欲憑錦瑟傳幽思
才理朱絃意已忘

宋濂

和劉先輩憶山中韻

憶昔山中鍊九陽
山頭旭日正蒼涼
鳳笙吹暖雲中火

龍藥凝成鼎內霜
靈戶啟扃森虎禦
中房持戟混桃康
山分秋色侵玄覽
蝸學天書篆敗牆
五鳥花開呼鹿守
千齡桃熟遞仙嘗
伐毛定欲追秦女
歌鳳誰能笑楚狂
種得神瓜如盎大
養來瘦鶴似人長
樓延虛顥殊庭上
樹蝕蒼霞曲瀨旁
劒氣尚堪吞鬼伯
詩魂端合起臞郎
但求脫粟三升飯
肯賦眠雲六尺牀
洞雪成漿烹日鑄
海苔為紙寫凡將
舉頭便覺三山近
小大俱冥百慮忘

思春辭

美人別我城南去幾見樓頭涼月生南浦
沉書尋素鯉東風將恨與新鷺丁香枝上同心結
九曲燈前白髮明花託芳魂隨鵲夢草移愁色上
簾旌物華半老燕脂苑春影輕籠翡翠城歌扇但疑遮月面
舞衫猶記倚雲箏因彈別鶴心如翦為妬文鴛繡嬾成
宮燭不啼偏有淚湘桃無語自多情巖南樹密晨烏集
江北潮回暮渚平幸有夢中能聚首喚醒恨殺短簫聲

和蘇編修游東明山詩

東明勝槩實佳哉。圖畫天然八面開。雲影入簾紛似絮。
巒光染袂綠如苔。學書猶憶臨池寫。采藥曾經帶雨栽。
祇為魚龍期變化。致令猿鶴互驚猜。數莖白髮雖侵鏡。
百鍊丹心不作灰。中使傳宣承顧問。東朝進講每低徊。
月移禁掖藏書署。花壓瀛洲視草臺。豈意衰齡霑異渥。
因茲勝賞得重陪。丁寧杉桂無奇句。約束溪山屬駿才。
倚杖指林尋故跡。賜衣濕雨借新焙。名篇遞玩叢如筍。
嘉卉當筵粲若杯。松鼠沿窗行且偃。山禽窺客去仍來。

但知笑齒時頻啟何事愁腸日九迴寄語山靈休厭我
有花莫待作詩催

陶安

壬辰清明日客有攜酒城東邀陳致中謝行可
程子舟馬希穆及余遊月盤洞天偶遇張文泰
遂全飲歡甚行可以老杜清明二詩次韻紀事

因就韻賦

錄一首

千門插柳綠含煙陌有輪蹄水有船花下酒盃堪獻酢

松間山路更攀緣
仙童見客頻留坐
飛鳥依人每可憐
席展園亭穀雜進
粥香鄰竈火新然
有閑愛結漁樵侶
無術能飛子母錢
自笑勞生空擾擾
欲求鼎藥為延年

蘇伯衡

送蔡思賢叅政使蜀

清晨旌節三川去
今日車書萬國同
燕餞都亭來詔使
停驂鄉井訪鄰翁
峯經回鴈邊聲靜
峽入啼猿樹影空
昭烈祠西諸葛廟
秦州城北隗囂宮
神交露立蒼茫際

長嘯風生感慨中
毛伯昔聞周上介
隨何今見漢明公
布宣德意相如檄
囊括山川太史功
河隴從茲兵不構
輾轉此去路相通
庭充橘柚陳方物
歌聽巴渝識土風
最是多情江漢水
直隨歸楫到江東

管訥

題典儀柳以臨九鸞白雲圖

清郎今是楚儀官
鴈蕩雲山畫裏觀
山似青鸞來九箇
雲非蒼狗變千端
倚門斜日楓林晚
拄笏高秋草閣寒

庭樹雞鳴思問寢江庖魚美阻承歡桂因招隱煙叢老
萱解忘憂露葉溥溪上樵歸風且便源頭童汲雨初乾
烏犍耕後曾秋穫白鶴歸時及晚餐東里遷居逢孟母
西鄰醪社祀丁蘭天邊見鴈歸心切月下聞蛩旅夢殘
紫誥定應來絢爛綵衣重得舞盤桓板輿前引行花徑
竹杖旁隨過藥闌春酒高堂介眉壽更圖家慶後人看
敬和畫碧桃詩韻

風流畫史惜年光寫出宮桃異衆芳深淺舊紅渾改色

輕盈新碧倍生香佳人金谷顏如雪阿母瑤池鬢已霜
不與杏花爭豔冶肯隨柳絮效顛狂靚粧姑射花鈿小
緩步飛瓊玉珮長勾引流鶯窺翠幕留連戲蝶繞華堂
題詩細詠情何極呼酒相看醉不妨帶露一枝尤瑩潔
絕勝湯餅試何郎

趙迪

題山水人物

德星堂倚碧山隈喬木縈紆曲澗回蘿逕亂侵紅葉滿

松扉不掩白雲來，深秋庭發黃金桂。
積雨階生碧玉苔，千嶂停雲脩竹暝。
孤琴候月綺窗開，夜深醉倚巖前瀑。
香暗吟餘雪後梅，谷口幽期時悵望。
輞川佳興日徘徊，溪聲夢入寒猿斷。
鳥影愁將夕磬催，佳句多情追沈謝。
閒居有賦勝鄒枚，珠林落影明窗戶。
翠壁飛花入酒杯，泉石趣幽依枕席。
芝蘭香藹近尊壘，鳥聲閒對雲間榻。
林影青浮江上臺，即此端居人境外。
更須何處問蓬萊。

王粲

送安南使還國應制

帝德如天四海同，卉裳相率向華風。
稱藩特奉龍函表，偃武仍包虎韞弓。
貢自炎方歸域內，心先流水到江東。
路經日出知天大，城與山蟠見地雄。
詔語陪臣趨玉陛，班隨仙仗列彤宮。
陳情委曲為蠻語，賜對從容徹聖聰。
駝紐新頒玉印重，螳觴屢飲尚尊空。
承恩共識皇華使，命將毋勞矍鑠翁。
已擬再將周日雉，底須復表漢年銅。
五絃曲奏鯨濤息，重譯人還鳥道通。
蒼生仁供旅食。

枕柳垂葉蔭詩筒部迎定見新王騎驛送猶思上國鴻
歌舞萬年常率化扶攜百越共擄忠大明燭物今無外
從此看如禹甸中

陶宗儀

題雪上張元之溪居卷

清溪流水白雲關處士高標玉筍班虛館數楹愚剡似
好山十里畫圖間風前高柳株株弱沙上羣鷗箇箇閒
煮茗汲清童子小引雛哺果鳥聲蠻研魚自可開尊俎

肅客何妨響珮環避世武陵同絕境濯纓還許散襟顏

易恒

清明約友遊崑山二十四韻

并序

是日期而至者五人不期而至者一人期而不至者二人表校書子英余道士復初實洪武十五年壬戌閏二月十六日

老逢節序感流年聊復追遊媿昔賢政以漸當修禊日也宜仍詠舞雩天人時並值良難繼童冠相隨亦足憐

耐可襟懷重弔古何煩羽翼遠遊仙寺因郊祐稱題勝
境出關荆點染玄塵世流光嗟百五浮圖幻界詫三千
海門翠割蓬萊股地軸蒼擎太華顛危石墮雲爭一髮
瘦筇削玉過雙肩行廚旁午開僧閣啼鳥留春近客筵
載酒岐陬猶問字挂巾蕭散類逃禪寓形宇宙何今昔
知己朋游孰後先道士步虛辭折簡校書寫韻撫遺編
采芳未許芝同茹結佩空期璧共連谷應雄談驚鶴夢
潭驚長嘯起龍眠青山若與斯文契白日寧於我輩延

造次雪盈明鏡裏等閒霞散落花前巨靈忽負鰲頭轟
舊鬼潛悲馬鬣遷碑蝕文章苔浸漬甬迷翁仲草芊綿
烏鳶螻螳俱成累鐘鼎山林各自便萬井村墟空杼軸
半樓風月尚鞦韆雜英疎薄無多好新柳纖柔有底妍
略見愁隨身外遣謾憑句就醉中聯乘時物色從教在
即事風光豈偶然躡屩歸來清不寐筠窗細寫白雲篇

童軒

建業清明書事

節物催人到客邊
江南風景迴堪憐
魚兒池館新生水
燕子人家又禁煙
幾片落花寒食後
數株高柳夕陽前
春衫小試香羅雪
駿馬驕嘶白玉鞭
綠水青山渾似畫
暖雲芳草最宜眠
松醪有客邀村社
麥飯誰家灑墓田
自愧道旁揚子宅
十年閉戶蟲生氊

湯盾勸

楚山覽秀

九州十分楚居三
背扼中華控斗南
鸚鵡洲長天接水

鳳凰山險市橫嵐綠雲蕩曉開還合紅日翻波吐復含

柳拂晴暉連鄂渚草分春色過湘潭樵夫喚酒攜村果
衲子縫衣采石楠釋悶曾揩高拄杖賞閑脛屈小兒籃
紫薑嚼過絲絲脆青蔗分來寸寸甘放膽江湖窮極翫
側身宇宙足幽探八公山下紅塵路五老峯前白石菴
非挾釣鰲投踈相可因馴虎見髯叅笑人席上排珠履
看客庭前墮玉簪漱浦香泥肥碧藕洞庭秋色醉黃柑
閒邊引興團空翠夢裏題詩到蔚藍傲睨飽觀江左勝

壯遊不載隴西慚
足間試過程程麗
眼底經來處處堪
好倩王維圖入畫
四明歸對故交談

題薛四公子湖山遊樂卷

勲伐旂常富貴家
偶將琴劍作生涯
一天麗澤懸舟尾
千里清風逐柁牙
蘇軾隄邊穿柳葉
林逋冢上擷梅花
看雲漫倚遷鶯谷
掃雪閒眠宿鷺沙
吳女踏歌番白紵
越兒扶醉側烏紗
馬前細路通三竺
鶴外遙岑隔九華
山鬼出遊乘赤豹
水神入賽舞玄鴉
布衣宰相陶弘景

火食仙人蔡少霞
羞著戰袍衝蟻陣
倦拖朝履聚蜂衙
雖猶紫禁官分粟
不類青門客種瓜
伏簷長魚供脆鮓
觸機巨鹿獻肥羜
鄰船借白春菰米
僧舍移鐙煮蕨芽
纔掬紅鹽咀橄欖
又斟綠醕薦枇杷
江心款試驚雷焚
海口徐回貫月查
兩漿輕波凌菡萏
半帆疎雨拂蒹葭
戲投小店呼無比
笑指高樓喚有巴
數擊斂昏津吏鼓
幾聲舒曉邏兵笳
詞林俊染藏詩軸
藝苑豪蹤落畫叉
樂地總教情若絮
穴途寧卹事如麻
錦囊收拾瓌奇滿

歸對都城作者誇

李東陽

春寒二十韻

軟紅香裏見車塵，剝取餘寒在水濱。
飛霰有時還著面，微霜何力尚欺人。
湖波欲動清猶淺，草色初回綠未勻。
捲盡簾櫳無燕雀，閱殘冰雪但松筠。
吳牛月下琉璃薄，胡馬風前首蓓新。
作態簷花如怯語，多情堤柳似含顰。
朝衣試換應嫌早，市酒從沽莫厭醇。
賜擬宮恩傳漢燭，

別憐歸思遶江蘋
山牆地坼蟲仍蟄
海國天高鴈始賓

醉愛火犀曾貢粵
歌傳土鼓漫吹豳
哦詩轉覺吟肩聳
癖統難醫病手皴
未放韶光過九十
肯拋長夜守庚申
瓊樓玉宇騷人遠
舊穀新絲野客貧
甲士夢驚曾徹骨
緯嫠心苦更傷神
綈袍范叔誰相戀
大被姜郎且共親
萬頃直須酬老杜
重裘幸免作窮陳
年華草草催雙鬢
宦跡悠悠寄一身
愁引凍泉分浙瀝
怕登高閣看嶙峋
每慚溫飽謀生拙
一任炎涼過眼頻
從此願持鄒衍律

遍教陰谷是陽春

聖駕視學有述

翠華重匝護金根
鸞駕從容下玉閭
一雨隔宵清輦路
五雲先曉覆橋門
中天地迴乘龍御
在廟心勞想駿奔
禮樂百年昭象設
衣冠三代藹雲孫
拜瞻共識師模重
坐講方知聖道尊
履上仙班星咫尺
耳聞天語玉清溫
鳳團賜茗公卿貴
雞舌分香侍從恩
敢謂文章非國運
故知籙豆有司存
休風令遣羣方動
盛事仍兼往代論

從此六經功久大須將覆載比乾坤

雪不止

漫將春雪比冰山日薄風稀漸改顏怯勢已銷紅獸炭
欣貧猶詠舊柴關無情竟作凌空去作態猶能拂袖還
積淖有時妨跋涉乘危何力任躋攀人情自覺多時厭
世事長于好處慳莫怪雲師大驅逐向來贏得一冬閒

陸容

送張企翱之廣東提學

天語遙將度嶺南一方師表羨君堪潛回風俗觀新政
樂育英才副昔談愛護襟期同鄭老能詩標格近羅含
少年科第曾誰負大好文章每自慚好士一生心耿耿
閱人多中目耽耽芹宮會講晨留榻柏府程書晚駐驂
道路漫從漚吏問姓名先得峒民諳蠻音啁哳初難辯
海味珍奇素所甘畫鼓發船馴巨鱷青衿擁坐聽春蠶
文身俗在能無教可語僧來不放參龍墨污脣閑吮筆
鴈冠籠髮老勝簪敷文聖代今同契典禮儀暫夙陋聃

逢石只應呼丈拜，歆泉寧復侶渠貪。
花明蕉荔供行色，味雜檳蓴當酒酣。
故國乾坤惟欠雪，莫年山水定工嵐。
清風入誦炎蒸散，化雨隨車槁瘁覃。
駿骨收時忘牝牡，色絲成後看青藍。
贈行已乏金兼百，餞飲何妨爵過三。
往事莫言溫室樹，殊恩還憶上林柑。
鸞墀寶玉留情獻，蜃窟遺珠借手探。
轉眼又期歸報最，坐移鄒魯到瓊儋。

吳寬

懷修竹書隱

春寒漠漠雨溟溟假寐書牀午夢醒十載客居便巷陌
一時鄉思繞園亭繁花照檻知堪賞亂石鈎衣憶所經
恰有古苔三畝綠都來脩竹萬竿青當窗好鳥通人語
挂樹危藤學字形日射韭畦朝可翦香凝授室晝常扃
鹿場舊築猶存號鶴冢新封未刻銘架上殘編歸擬讀
移文不待北山靈

次韻鼎儀世賢問予病目

藥裏長隨老杜居全憑坐客誦方書巖前激電空聞爛

屋上繁星頓覺疎
遙望未能知
匹馬不祥幸
免見淵魚
詩家善謔坡
應爾旅館清
齋澤也如似
說北門春色
近
試分東壁夜
光餘煩君漫
舉盧全事
此事非予却是渠
時玉汝得子
誤以見戲

文林

還家十韻

中外驅馳二十年
暫依桑梓息塵緣
豈無薄祿終非計
幸已還家莫問田
歲久先廬從敝甚
水邊喬木故依然

過從喜有貧親戚，檢理猶存舊簡編。
千載秋風三徑菊，一篙春水五湖船。
飯抄雲子長腰米，羹煮銀絲縮項鱖。
繞屋溪聲林下樂，滿窗花影日高眠。
晚於世味駸駸淡，靜覺閒居事事賢。
作計已逃多辱外，收功能及未衰前。
只應今夜西齋夢，不到紅雲北斗邊。

述懷

閉戶無端鬢亦絲，尋梅有夢覺方知。
嬾揮塵案書高積，喜展風簾鳥下窺。
兩月春陰愁共結，百年身世老難支。

微酣坐睡似入定久臥拜官如出師弘景畫牛心獨遠
龜蒙養鴨性還癡且便東郭田常稔肯使北山文更移
鄉味已甘菰米飯舊遊空憶草堂詩從渠冷暖過還定
自我悲歡往可推獨鶴於人亦何有閒庭闊步鎮相隨
儲巖

鄭城大雪追次應韶韻

雨雪淹旬記秣陵燕南三月尚嚴凝帷車戒曉初聞霰
佩劒衝寒似握冰野漫忽迷官路曲水明聊見女牆層

却妨宿麥經春爛似厭繁桃向日蒸凍合詩肩饒噤痒
花生醉眼任瞢騰憑君莫擅山陰勝瀛海奇觀恐未曾
楊循吉

新治小軒成

費將心力治齋居細竹移來葉尚疎雪白蠟光鋪榻眼
鴉青布色染簾裾規模別出經營外景物新呈晦沒餘
髹辟正防童稚汚粉牆還待友朋書今宵纔是題詩起
此席方為讌客初前郭後村無曠地相過莫怪不寬舒

沈周

市隱

莫言嘉遯獨終南，卽此城中住亦甘。
浩蕩開門心自靜，滑稽翫世估仍堪。
壺公溷世無人識，周令移文好自慙。
酷愛林泉圖上見，生嫌官府酒邊談。
經車過馬嘗無數，埽地焚香日載三。
市脯不教供座客，戶傭還喜走丁男。
檐頭沐髮風初到，樓角攤書月半含。
蝸辟雨深留篆看，燕巢春暖忌童探。
時來卜肆聽論易，偶見鄰家問養蠶。

為報山公休薦達只今雙鬢已飢飢

東園

芳園好在齊封內不似生涯事灤西帶月檻泉臨晚灌
向陽膏土及春犁魚鱗密執多佳種井字新開足小畦
鄰叟見侵頻讓畔貴遊來踏偶成蹊雞荒綠遍千鋤草
封植香加百簣泥嘗見蟻螬食苦李不嗔童子覓楸梨
紺芽紅甲時時長碧肄細枝得得齊著雨桃花衝燕落
受風楊柳信鶯啼輸官不敢逋桑稅款客猶能薦韭齋

風月獨追司馬樂笙歌偏笑辟疆迷乞裁帖子兒親送
種樹方書袖每攜我憶尋芳一相過衡門寂寂土牆低

胡璣宗

春江聽雨贈尹舉人覺

扁舟新買繫江邊風滿三谿煙滿川楊柳花飛雀欲啄
芳洲沙暖鳬初眠情親客子酒連夕性僻主人詩累篇
細雨帶泉遙浙瀝小灘入枕共潺湲即看石潤螭生玉
見說雲盤龍在田江曲踏花花拂面長安春色醉如仙

石湖篇送盧師陳兼寄黃得之吳與成

石湖蕩漾照姑蘇十里樓臺接具區天子賜名猶舊額
相公結屋又新櫨山搖百畝玻璃影雲擁四時霄漢圖
月下舟航攜海島水邊亭榭坐冰壺繫觴鄰叟經旬醉
鼓枻漁人中夜飲兄弟文章堪繼陸縉紳科第獨稱盧
皋橋黃子才相望震澤吳生道與俱春草詩魂吟薜水
秋風歸思動尊鱸酒逢賀監應忘我名並楊炯豈溷吾
白下相看忽相送虎丘何日共攜觚

楊慎

長江萬里圖

五才坎德迴靈長萬里岷山始濫觴流漢天迴經濫灝
盤渦谷轉下柴桑揚瀾左蠡曾潭府大壑歸虛廣莫鄉
天遣陽侯分淼淼帝咨神禹畫茫茫岑青翠觀鮫人館
水碧金膏龍伯堂景浴陽烏朝旭早皎然陰火夜霞光
煙寒星散三洲樹風致雲飛百尺檣鶴子鳬雛喧澍雨
紋螺錦蚌映翔陽籠筒津鼓驚浮客欸乃漁歌屬赧郎

泗磬石鐘鏘島嶼輕連蘋彩媚滄浪投鞭堪笑苻堅策
靜練難賡謝眺章彩鷁退飛休借問白鷗浩蕩信徜徉
費家

近田為左軍許經歷作太宰松皋公子也

世祿人家儉素風莊前常產十餘弓鳥犍散出林塘畔
白鳥羣飛煙雨中附郭料無三里遠為鄰何止八家同
多情食力如徐穉有訓遺安似德公萬點秀峰秦洛界
一渠流水渭河通臨餐日日知農苦憂國時時願歲豐

隨柳傍花春早晚
瞻蒲望杏墅西東
兒孫來往壺觴便
賓祭從容禮數崇
載滿幾車曾自祝
笑分三白是誰功
阿衡相業從莘野
正好趨庭問乃翁

黃佐

庚子三月八日奉命充經筵講官有感賦十韻
春風環珮集羣仙
回首瀛洲二十年
院柳綠垂鸞駕外
宮花紅入鳳池邊
曉承綸綍開經幄
夕佩蘭英拱御筵
青瑣赤墀聊復爾
璇題珍館故依然
三階瑞氣纏黃道

六籍榮光出翠川
祖武直從高帝始
人文真羨孝皇前

座臨北斗霑堯酒

永樂中講讀官
燕春同尚書

簾捲南薰協舜絃

天順

中延諸學士于便

殿命中官撫琴
長樂賜來霞錦豔
上林擎出露桃鮮

賡歌正值光華旦
下拜同瞻咫尺天
遙望帝城珠樹裏

金華涼月夜娟娟

文徵明

次韻履仁春江即事

二月江南黃鳥鳴
春江千里綠波平
朱甍碧瓦參差去

水荇蘭苕次第生
風外鞦韆何處笑
日斜鐘鼓隔花晴
洞庭煙靄孤舟遠
茂苑芳菲萬井明
唱斷竹枝空復恨
流連芳草不勝情
何時載酒橫塘去
共聽吳娃打槳聲

董份

積雨後有懷寄承山宋丈

知君早已脫塵鞿
盡室南還隱會稽
避世共看同野鶴
談玄獨許對窗雞
千山天遠雙輕屐
萬壑雲深一杖藜
自憶同時辭赤紱
却慚幾歲隔丹梯
夢中每欲遊天姥

雪裏還期泛剡溪正值門前春水漲鯉魚寄自浙江西
周復俊

秋千咏

并序

昔人賦麗人行而近世學士亦有秋千之作其思
一也惜詞謝雅馴情流綺靡君子譏之余乃借反
騷以見志而率道之以正焉

閨中少女怯春眠日日行遊玉砌偏芳草萋時花壓谷
高臺望處柳彌川綵絲蕩颺渾無跡繡柱縈紆會有緣

弱力擬攀青漢上笑聲常寄白雲邊鶯鳴拂澗如爭勝
蝶舞穿林亦助憐倏忽扶搖曾萬里尋常軒舉詎三千
丹榕一任丹霞落翠帶雙飄翠葉寒絕伎漸驚凌幻化
纖肢宜妬為嬋娟樓藏綠水侵珠履陌染飛塵上翠鈿
面藥肯隨清露泣佩香遙借惠風傳倒垂度影天山竹
仰睇澄光玉井蓮躡景偶同黃鵠舉憑虛聊聽紫雲旋
私危落勢頻相顧共許輕容未易捐豈逐魚軒春宴後
若依鸞扇晚妝妍團情團思牽芳杜微酒微歌近小筵

寧羨玉樓雙進竿，不窺寶馬並搖鞭。
閒窳倚幌臨明月，佳樹垂條鎖嫩煙。
蒲柳不因涼後萎，千秋常傍此臺前。
楊繼盛

送劉蘇涯考績北上

春樹蒼蒼春浦晴，紅亭黯黯送霓旌。
留連鳥語憐人別，荏苒楊花共酒傾。
桃塢雨餘香氣合，錦江潮靜浪痕明。
煙浮曉巘巔，屹碧霞逐征帆縹。
縹輕牛渚曲，通瀛海澤。緱峯迴倚秣陵城，
月高鷗在鏡中宿。溪漲檣疑天際行。

牛野分星驚太史燕雲如幕覆神京
楓宸報政恩波潤椿座稱觴彩袖盈
知己漸隨流水遠離愁端與削山平
論花每惜松顏落折柳應悲鴈序更
旅病偏因歸客劇夢思祇為故鄉生
送君惟有東風淚點點沾巾無限情

送張觀海分教偃城十韻

相知每恨未相識聞說遠遊情更親
曉日初分溫室樹文風先度偃城闌
稀微殘月明霜劍密冪孤煙逐晚塵
野鳥迴隨征旆沒客袍猶帶曙光新
東觀海氣冲晴漢

南望嵩雲接紫宸
避俗祇應求吏隱
此行原不為家貧
河陽桃李蓓蕾合
洛渚魚龍變化均
羶榻謾勞悲冷局
清朝亦是重儒臣
心旌搖落懸雙淚
守拙支離愧一身
君愛寒官儂愛死
古來天地幾癡人

許國

大閱應制

鸞輿宵駕鳳皇城
羽仗晨臨虎豹營
閃日旌旗通御氣
殷雷笳鼓雜春聲
千夫盡是幽并俠
七萃俱傳衛霍名

蹀躞銀鞍大宛馬陸離金甲曼胡纓屯來雲鳥渾為陣
練後林猿總識兵隊隊穿楊呈技絕雙雙超乘鬪身輕
北庭咫尺降封豕南海須臾斬巨鯨又見軒車馳涿野
豈如漢艦集昆明椎牛競奏軍中樂飲馬誰歌塞上行
全勝古來惟不戰願敷文德洽昇平

申時行

遊陽山

陽山高峙郡城西紫氣氤氳碧落齊鳥道百盤凌恍惚

鷲峯一柱截虹蜺層空半壓穹窿勝絕頂平臨窄窠低

穹窿窄窠

俱山名

天與岡巒開寶地人從霄漢躡丹梯藤梢礙

石疑中斷樹杪攀崖更上躋笠澤晴波遙見鷁扶桑朝

旭遠聞雞亭標浴日懸新構辟洗常雲識舊題古廟白

龍行雨過危巢蒼鶻向風棲陰森忽起松間籟偈仄誰

開李下蹊落照重重銜夕嶂飛泉瀲灩灌春畦盪胸海

色三山出入皆煙光萬井迷指點吳宮萋碧草依稀秦

觀護金泥山僧習靜時鳴磬野客尋幽獨杖藜欲學盧

教遊汗漫言從慧遠住招提嘯歌直擬邀鸞鶴來往惟
應伴鹿麋酩酊不辭歸路晚玉壺春酒正堪攜

王世貞

酒房戲為長慶體示四郎姪

且問吾家小杜康潑醅濃醖許誰嘗軟炊新稻真珠粒
細壓寒槽白玉漿瀉出流霞偏讓色摘來甘露有生香
休論染指涎先下任遣持螯手自忙晝要督郵缸底靜
宵防吏部甕頭狂十年奔走愁為伴萬里歸來醉是鄉

席上清樽仍北海城中舊侶有高陽秫田已滿七百斛
泥飲從今三萬場漉後葛巾堪倒戴頽時藜杖好扶將
憑教卯酌還丁夜不擬人間喚索郎

吳國倫

竹里館詩

竹里名依華子岡何年移傍此君堂鮮筠裊露丹珠細
勁節凌霄綠玉長數畝繁陰飄陸海萬竿疎雨過瀟湘
樽邀梁孝園中月袖拂元卿徑裏霜羌笛未裁龍競奏

秦蕭欲截鳳毛翔
嬈娟隔幔琴徽冷
葱菴臨池水脉香
居士風流還洛下
故人消息半山陽
異時看去同誰好
獨有王猷興更強

謝榛

金堤同張肖甫賦

金堤重到感西風
瓠子猶思漢武功
雉堞遙連千樹暝
龍珠不見二潭空
芰荷老盡飛霜後
蕭管寒催落照中
白髮滄洲幽事在
黃花綠酒故人同
謝安此日遊山劇

潘岳當年作賦工
無數峯巒秋色裏
高歌相對欲爭雄
皇甫汈

寄題似樓贈房考李時言

建溪百折徑千重
上有精廬敞碧峯
盡訝樓臺開翡翠
多言閣道倚芙蓉

名城

平臨島嶼偏宜月
俯瞰煙霏半在

松仙客好居時
獨往大夫能賦幾
相從靜中名理虛
為指物外行藏幻
是蹤舊日李膺門
下士閩雲南望憶
登龍

徐渭

上督府公生日詩

并序

嘉靖己未秋九月廿有六日恭逢督府明公之生
辰於是文武吏士及鄉大夫士若耆舊賓客以公
自鎮撫以來功在東南者實大且遠乃相與各抱
其所有以爲公長久祝而公於今年春夏之交受
諸道告捷之後奏凱天闕戢兵海隅民物熙和旬
宇清廓惟茲嘉誕適屆其時萸菊交芳天日俱朗

旌旗應爽氣而彌肅饒吹協商颺而並遠慶者雲
集萬衆一辭比之往昔益為隆盛某小子叨沐寵
榮間常一佩筆操鉛以奉侍幕下雖愚賤少文不
敢自附於衆人之後至於仰清光祝久遠其心固
無異於衆人也謹撰長篇凡百句奉伏門下以充
獻壽之禮自知拙陋無所發抒然慕戀恩私忻喜
盛事自不能已於言耳

遠曙輕籠海色蒼涼颺新薦菊英黃清秋此日逢華誕

繡祿當年遶異香地與人文增氣象天為王國產禎祥

壯猷未老如方叔秘略曾傳似子房初捧兵符分虎竹
再銜使命馭龍驤森羅島嶼諸夷會鎖鑰門庭一面當
刁斗不傳人自樂牙旗欲動勢偏揚雄豪定遠遙辭漢
寬大汾陽近在唐管領東南新士馬掃平吳越舊封疆
曾先突騎重圍裏親式鳴蛙大道旁已遣嚴兵營細柳
更教長劔倚扶桑三承寵錫恩何渥一受深知德愈光
定有姓名題御宸每勤賞賜到遐荒千齡素質雙麋鹿

五色奇毛兩鳳皇國有昌符臣協吉家承嚴訓子徵良
田單下狄親鳴鼓姬旦居東久缺斨屢觸歆炎辭羽蓋
轉巡郊野憩甘棠軍中作氣頻投石陣裏籌機捷探囊
敞日轅門標大纛浮天水寨集餘皇彫弓並月名繁弱
寶劒衝星出豫章幾處名香迎馬首數羣長鬣夾車箱
量兼滄海涵諸島身作長城障一方萬里星辰羅北極
百番貢道出東洋曹彬賜劒權偏重庾亮登樓興合狂
引至偏裨堅誓約邀還賓佐據胡牀鯨鯢久已封京觀

翡翠行看出越裳詎止芳名流簡冊還將偉績著旂常
功成淮蔡應趨闕路涉燕齊好侍糧將相位無勞出入
君臣道合致平康山城令節茱萸發高宴華軒錦綺張
日照花明諸樂作風吹帳啟衆賓藏鶴鳴流響聞天漢
芝燦浮光到羽觴競取良辰占上壽復欣嘉會嗣重陽
樹聯月桂輝花萼斗近天河挹酒漿黑齒呈歌須譯問
文身獻舞傲專場地連玄嶠仙常集候傍黃鍾日漸長
共以精誠抒華祝況兼佳麗屬錢塘輒生本住山陰里

浪跡疑乘海畔航城下釣魚懷漂母堂前結客憶周郎
未逢黃石書誰授不墜青雲志自強抱玉已憐非楚璞
吹竽那識動齊王幸因文字蒙徵檄時佩管毫侍瑱廊
綦履東西魚共麗戎衣左右鴈俱翔縣知陳阮時遊魏
豈乏鄒枚並寓梁博彩燕昭期致駿曲存宣父愛非羊
衆人國士階元別知己蒙恩心所量自分才難堪記室
人疑待已過中行構成燕雀猶知賀報取瓊瑤未可償
偶值高門掛弧矢且賡小雅賦桑楊却慚未協宮商調

莫並當筵巧奏簧

奉侍少保公宴集龍游之翠光巖

命與沈嘉則同賦時方有

閩之役

樓船幾日下錢塘勝地臨江綺席張虎帳山開蘿作帶
龍潭水積劒為光芳羞自出船窗底妙響偏宜舞扇傍
日映桅檣兼樹密風吹絲竹裊雲長漁郎賈客停何事
桂楫蘭橈渡不妨暫脫錦袍懸翠壁忽抽彤管拂青絳
閒中國計籌能悉醉後兵符發更詳寶馬嘶羣行雜錦

紅旗懸的射穿楊
霜前下葉沙俱積
雨後殘碑蘚更香
野曠牙官分作隊
林疎甲士補成行
松杉借翠連幢碧
橘柚分金映甲黃
羽扇周郎臨赤壁
輕裘叔子在襄陽
庾樓無月人猶往
郤幕開風客不藏
遠眺非關耽麗景
雄心先已到遐荒
建溪露布風雷急
淝水兵威草木揚
却與從行諸幕士
維舟九曲泛清觴

沈明臣

題杜武昌子睿浣花莊十韻

少陵故有浣花莊此地公然亦草堂杜曲宛如移渭水
武陵何必傍沅湘鷓鴣對浴金河淺屬玉羣飛鏡浦長
北沼春雲連遠嶠西樓明月挂垂楊薔薇不見東山妓
芍藥空流鄭洧觴金谷礪曾娛散騎平泉石可並奇章
采芝谷口逢麋鹿送客山前見鳳皇靈藥萬年留墨客
桃花千樹引漁郎誰家最近參差竹出入藤蘿每不妨
馮時可

贈大宗伯陸平泉二十韻

聖代三儀典秩宗早辭簪笏遂高蹤不妨居士稱金粟
自羨留侯訪赤松世卜休明瞻瑞鳳人看玄德望猶龍
禪心不染空為觀至道無名淡是濃法寶六時翻貝葉
星冠七蕊製芙蓉山中使者除朝請林下高僧日過逢
塵尾言言推理窟鵬鬢語語落談鋒人天壽域開三泖
斗極星躔應五茸彩服錦章光燭昶卿雲靈靄氣葱籠
飄飄仙樂清都近優渥君恩紫誥重憶昨明禋開秩典
曾陪泰畤奠圓琮彤墀響識尚書履蒼玉聲寒禁苑鐘

已見朝端諮上理寧陳禪草議東封法宮論道叅宸幄
太廟升歌預辟雍喜對聖明多獻替恥隨時俗競周容
角巾便挂青門柳野服行攜綠玉筇姑射餐霞嬌雪貌
陽和晞髮盪雲胷賜袍膝下班衣映載酒門前籃輦從
玉樹瓊林森鬱鬱彩鸞丹鷲並嗶嗶從教坐閱僧祇劫
歲歲稱觴祝九峯

馮大受

端州七里巖

即崧臺
石室

紫陽靈隱原標勝石室崧臺更吐奇不是乾坤偏縱此

何由山水得無之山開疊疊百重嶂水作汪汪千頃陂
乍訝蓬萊環弱水恍疑玄圃在瑤池飄搖羽蓋虹梁度
張列屏風錦繡帷月榭風亭時點綴琳宮梵閣互參差
雲迷嶺際疑中斷影落波心盡倒垂古壁曳霞驚絢爛
華林錯綺競葳蕤平臨日月天門邇俯聽風雷洞壑欹
澄鏡甘泉如玉液疊花垂乳似瓊脂斜穿窈窕蓮花洞
亂挺崢嶸琪樹枝雲擁石龕成佛座螺旋穴竅出巖陞

清虛非復人間世靜僻渾如太古時醉石華軒宜對酒
爛柯仙局好敲碁朝陽雲霧爭吞吐天柱峯巒競嶮巖
星渚垂虹縈玉竦閭風夕照漾清漪阿坡巖畔觀泉湧
泛斗亭邊作水嬉隔岸蘼葭飛白鷺遶堤楊柳聽黃鸝
湖光雲影相摩盪密樹層崖互蔽虧幽並甌江雙鴈蕩
秀分蜀道一峨眉須知造化能融結詎假人工巧剗削
一日陰晴多變態四時花月總相宜吾生最有煙霞癖
到此頓令心志移好景難逢須記取臥遊披此亦神怡

楊于庭

春日樊欽之侍御招同彭應壽太守寶林寺飲
為惜春歸強伴春招攜春醞對吾真茁芽銀杏濃於酒
學囀黃鸝巧似人已借祇園開勝集還思寶筏問迷津
與君一酌頻前席若箇三生是後身自哂鹿門渾欲老
誰云龍性未全馴客從分虎占循吏人自鳴驄識諫臣
獨愧草玄空寂寂也陪浮白醉逡逡諸公豈是池中物
而我曾非席上珍出處總憐吾道在醉醒寧問世人嗔

敢緣綵筆爭詩長猶喜青山傲酒民老去積薪嗟汲黯
晚來投轄為陳遵煩知襜襜揮團扇狂欲爬搔岸角巾
下筇不須談蜀筠為羹何必減吳蓴千年河朔豪仍劇
十日平原跡未陳行酒儘教邀塔月徵歌會見拂梁塵
花明隔岸紅初染草映雙林綠未勻但共松間看翡翠
從他閣上畫麒麟主人更欲修春禊休沐君其問水濱
寄語春光謝知己莫嫌滄海一窮鱗

范鳳翼

秋日社集僧房仍移酌田家分韻得微字

空門浩劫駐流暉
遇賞同人願不違
槌磬法堂生午寂
浮杯僧擔卸雲飛
鴈鴻影澹書空遠
絡緯聲悽得氣微
葭莢半藏漁父艇
豆花全護野人扉
好將庭際垂楊線
為製霜前青芰衣
細切橙齋魚味美
新萵菊釀蟹脂肥
四時覽勝三秋最
千里論交一士稀
試問吾曹開社後
東南風雅定誰歸

舟次立秋

俄驚一葉下長河客路無秋意若何乍喜青飈將暑去
更憐新雨贈涼多陰森岸樹如褰幕碎曳波紋似織羅
風檻半局螢巧入夜砧初動鴈偏過魚鱗片片黏青漢
蟾影娟娟濯素波局罷壺乾宵漏斷一聲何處起漁歌
熊明遇

春皋即事

楊柳依依護草堂幾天新雨沃羣芳郊原本是雲為屋
墅圃還添竹作牆細水平流通曲岸高山遠照落橫塘

遊魚潑潑搖池閣啼鳥啾啾弄晝長客子尋花過野店
農夫編黍葺荒莊烟霞作伴堪消渴麋鹿同遊豈病狂
但向杯中時引滿何須戶外問行藏憑人說盡安危事
江上春風燕幾行

侯恪

燕市十四夜何稚孝太僕邀同蘇虹如侍御姚
孟長張叔載魏仲雪楊濟之年丈小集限燈字
七言排律六韻

每呼燕市酒如澗此夜從君醉不勝欲試春風三五豔
還看明月廣寒澄樓頭長繫雲為錦霧裏爭飛火是繒
珂里何人鳴玉珮香車到處耀華燈祠傳太乙焚膏粥
路憶星橋暗武陵歌罷落梅猶未曉不知仙露為誰承

吳兆

後湖看荷花

松杉交翠夾隄長蓮子花開滿署香玉漱覃拖深覆艇
碧潭歷亂密迎榔紅舒粉飾齊金製星綴霞蒸鄂繡張

莖刺健能棲翡翠，藕腸弱可繫鴛鴦。
已鍾秀麗三山色，復染鉛華六代粧。
城帶夕陽翻蝶影，岸縈芳草映苔光。
珠擎既愛田田葉，規接還憐各各房。
爽氣驚林知露早，陰嵐拂檻覺杯涼。
西園夜月同飛蓋，南國秋風藉作裳。
何幸承君生顧盼，豈辭零落委寒塘。

王鎧

筍生十二韻

何人斬伐到脩篁，常憶兵戈一慘傷。
一壘鶴飛君子化，

九淵蛇蟄哲人藏風雷馬策生鱗角曉暮鮫珠上頰芒
蟬腹俄抽青玉劒虎皮初解綠沉槍錦裯天分龍兒抱
翠尾風吹鳳子翔鳥樂巢深枝接葉鶯啼日靜粉飄香
吟哦已有笙竽荅愛惜曾經尺寸量颺入聲柔千珮緩
月明影立萬夫長手親拔盡沿根草眼見參過覆頂楊
清閤一窗堪把卷寒侵三伏擬移牀即今深匿從嗔客
依舊濃陰覆野塘物理細推消復長但留根柢耐瘡瘡

通潤

山中書懷

谷幽略似百花潭，山水新奇頗盡探。
見客未能酬禮數，逢人強半笑癡憨。
欲將多寶融成塔，聊借羣花暫作菴。
曉起急磨鋤芋鏹，春來先製采桑籃。
婆娑月底看叢桂，潦倒風前種石楠。
反舌正當逢夏五，衆狙不復怒朝三。
香塗刀割身能忍，藥苦錫甘舌盡諳。
泛水鳬鷺皆得意，采香蜂蝶未忘貪。
孤寒卒歲能消遣，佛法何人肯荷擔。
坐倚琅玕春寂寞，謾言吾道在江南。

良琦

柳塘春小集以柳塘春水漫分韻得塘字

亂後山人兩鬢蒼雲山百里久相望孤舟江水夜乘興
流水桃花春滿莊談笑便須相抵掌清幽何所共持觴
芙蓉芳渚雙溪轉楊柳飛軒萬樹長陰拂綺筵賓正集
花吹玉筍酒偏香倉庚得友間關好翡翠窺魚取次翔
世上風塵方瀕洞山中日月且徜徉輞川別業聲聞似
栗里閒居志趣強君向此時真遯跡我慙明日過橫塘


戲題陰涼室階前芭蕉

新種芭蕉繞石房清陰早見落書牀根霜零落北山潤
葉帶濕雲南澗涼得地初依蒼石瘦抽心欲並綠筠長
雨聲夜響巔厓瀑晴碧朝浮海日光樗櫟自慚全壽命
梗楠合媿託巖廊觀身政憶維摩語草字寧追懷素狂
白晝棲遲吾計拙青霄偃仰汝身強歲寒要使交期在
莫畏空山有雪霜

秋華亭

片玉山西境絕偏秋華亭子最清妍三峯秀割崑崙石
一沼深通渤澥淵鸚鵡隔窗留客語芙蓉映水使人憐
桂叢舊賦淮南隱雪後嘗回剡曲船北海樽中嘗斂澹
東山席上有嬋娟紫薇花照銀瓶酒玉樹人調錦瑟絃
醉過竹間風乍起吟行梧下月初懸一聲白鶴隨歸珮
何處重尋小有天

御選明詩卷九十五



總校官庶吉士臣侍朝

校對官編修臣莫瞻菴

謄錄監生臣和其聲

欽定四庫全書薈要

集部

御選明詩卷九十六

詳校官原任主事
臣李斯咏

欽定四庫全書薈要卷一萬八千五百九十六

集部

御選明詩卷九十六

五言絕句一

劉基

春晚

疎雨隨風過輕寒薄暮歸猶憐數花朵辛苦駐春暉
遣興

於越三年客思家一百旬如何今夜月却憶鏡湖春



漫成九首

錄三首

日暮庭陰合，斜陽復照簷。
不禁風絮亂，寂寞掩重簾。
病身勞應接，長日掩雙扉。
燕子來何晚，春歸寒未歸。
萱草花空發，丁香子又生。
浮雲無處所，孤月不須明。

題墨竹

風梢舞空烟，露葉滴晴月。
折取寄情人，感此歲寒節。

歲晏

歲晏悲風急，空江白晝陰。
黃蘆與紅蓼，無處不傷心。

宋濂

題亭上

意隨流水行却向青山住因見落花空方悟春歸去

陶安

棟葉

棟葉垂萬珠碧重枝亦俯驚問此何因白晝霧如雨

晚涼

孤螢屢明滅長飈驅濕暑幽枕擁虛窓夜聽竹間雨

汪廣洋

贈孫炎

建業孫公子文如李謫仙
江頭看明月醉枕酒併眠
過吳城山

夜過吳城下不眠閒倚窓
遡流雙櫓健搖月下西江
江上

昔從江上去今從江上還
家僮笑相語又過小孤山
灘行

花底駐鳴鞭曉行江上船上流風較穩百丈不須牽
聞道沙溪酒春來如蜜香買將千百斛取醉到東陽
灘上水平沙拔舟蕩落花吳儂不相識對面浣春紗

登蔣山望江亭

絕頂出華構有時來一登曾將六朝事閒問百年僧

畫虎

虎為百獸尊因敢觸其怒惟有父子情臨行更相顧

夕景

水樹和烟生人家傍沙語孤帆何處來驚鳬去如雨

蘇伯衡

絕句

落葉滿衡皋蕭蕭風雨夕一燈溪上明何處獨歸客

張以寧

泊十八里塘

繫舟古柳根一犬吠柴門欲記來時路問人何處村

渡江

幾載途中月窺愁酒半酣送人楊柳色今日是江南
題道士青山白雲圖四首

仙館白雲封青山第幾重道人時化鶴巢向最高松
行到溪源盡青山無俗氛道人拈鐵笛吹起滿川雲
只道溪源盡遙聞鐘磬音却尋流水去行盡白雲深
雲氣曉來濃前山失數峯道人夜作雨呼起碧潭龍
木槿花

朝昏看開落一笑小窓中別種蟠桃子千年一度紅

太和縣

曉掛船窓看蒼茫暝色分前山知有雨流出滿江雲

揚州廣城店

潮落邗江夜先將夢到家揚州無賴月獨自照瓊花

袁凱

京師得家書

江水一千里家書十五行行行無別語只道早還鄉

寄家書

白髮時時脫青山處處同人行千里外書到五湖東

龍江夜行

細雨過江頭孤篷夜未休歸心與烟浪相逐下揚州

江上二首

野屋藏春樹江隄倚暮花買魚留楚客沽酒問吳娃
日暮江風急江花水上飛吳船三十丈載得夕陽歸

無題

門外青青草今年更覺深前時玉釵隨侍婢不能尋

春衣裁翦罷密葉間穠花縫到鴛鴦處行行線脚斜
因何彥明賦八新效其體

新烟

覆堤初冉冉渡水尚遲遲一樹梨花色猶能似舊時

新水

柳外朝朝雨平添過舊痕往時桃葉渡今日更銷魂

新燕

乍拂芳池遠還窺繡幕重莫將花片蹴飛舞滿筵中

新草

水邊春尚淺沙際葉纔穿
拾翠雙雙女迢迢度碧烟

新鶯

芳樹何年到西園
夢裏驚不須重聽汝只是舊時聲

新柳

淺色初含雨輕陰未過池
黃昏畫樓畔最是斷腸時

新蝶

怯露依芳蕙驚風入繡幃
莫將羅扇撲更待滿園飛

新月

既從碧雲上復傍綺窓移願得長如此教人學畫眉

高啟

為外舅周隱君題雜畫五首

斜陽榜釣船秋色滿江天彷彿吾家近沙村落鴈邊
白鶴忽飛還松杉靄然暝明月出溪橋照見支筇影
風雨過蒼嶠秋色渺江海白鷗期不來沙上人相待
落葉帶回吹荒筠冒幽石池上鳥鳴時閒齋掩秋夕

山深嵐氣寒高齋掩窓卧林間踏葉聲知有樵人過

春溪獨釣圖

春水鰕魚肥垂綸坐斷磯羊裘人易識好著舊蓑衣

林下

樹涼山意秋雲澹川光夕林下不逢人幽芳共誰摘

階前苔

莫掃雨餘綠任滿閒階路留藉落來花春泥免相汙

蓴菜

紫絲浮半滑波上老秋風憶共香菰薦吳江葉艇中

尋胡隱君

渡水復渡水看花還看花春風江上路不覺到君家

淵源堂夜飲

懸燈照清夜葉落堂下雨客醉已無言秋蛩自相語

和陳左司夜泊桐江

月出釣臺樹長灘秋更喧渾如宿巫峽唯少一聲猿

過獅子林

雨餘鳥語涼斜陽竹深見頻來非看花借讀高僧傳
過舊送別處

前時送畫船西港柳株邊別處愁猶在鴛鴦不肯眠
懷陳寅山人時居西山昭明寺

聞看西澗月秋閣與僧開正是相思夜鐘聲君處來
略上人房竹

幽篠半梢橫山窓颭月明上人禪定久不怕有秋聲

別呂隱君

孤舟晚溪口欲去重回首不忍別青山況此山中友

黃氏延綠軒

葱葱溪樹暗靡靡江蕪濕雨過曉開簾一時放春入

喜從兄遠歸

聞汝歸舟到相迎只恐遲方當見時喜還憶別時悲

寒夜與家人坐語憶客中時

茅屋夜燈青竹庭寒雪白不對室中人依然去年客

雨中過玉遮山

尋鐘入蒼茫一澗復一崦落葉去方深山扉雨中掩

西寺晚歸

遠寺別僧歸隨鐘出烟嶺犬吠竹林間斜陽見人影

白葵花

素彩發庭陰涼滋玉露深誰憐白衣者亦有向陽心

得家書

未讀書中語憂懷已覺寬燈前看封篋題字有平安

期陳則不至聞宿清隱蘭若

幽禽雨中響門掩春塘綠思君暮不來應伴山僧宿

曉發山驛

風殘杏花曉馬上聞啼鳥茅店未開門山多佳人少

僧舍訪呂隱君為學上人題墨竹

山房竹雨過簾影靄春雲得與幽人會何殊見此君

題孫卿家小畫二首

高嶺冒層嵐疎林逗殘照何處覓孫登雲間聽長嘯
前林遠杵歇別院疎鐘起行人與居人同在秋雲裏

叢竹圖贈內弟周思敬就題

窈窕復蒙茸，千山萬竹中。
幽人夜驚起，秋雨共秋風。
題張來儀畫贈張伯醇

風起澗聲亂，景寒雲氣深。
山人歸卧晚，詩意滿秋林。
次韻及禪師懷王水曹

千峯一寺遠，雲滿跣趺處。
無客伴孤禪，懸燈照深樹。
夜聞雨

窓燭冷殘夜，聞蛩更聞雨。
秋館總多愁，猶勝在羈旅。

題方壺小畫

夕陽數峯遠
靄靄江南思
烟外有鐘聲
山僧獨歸寺

大癡小畫

溪水雖多曲
舟行不憚賒
山山秋樹赤
猶復似桃花

扇上竹枝

寒梢雖數葉
高節傲霜風
寧肯隨團扇
秋來怨篋中

吳仲圭枯木竹石

叢篠倚喬柯
秋陰雨尚多
風霜莫搖落
留蔭石邊莎

題倪雲林畫贈因師

含暉峯下路樹石盡垂藤欲認莓苔迹相尋行道僧
題徐山人畫贈內弟周思恭

複澗兼重嶺雲嵐處處生君家還可認為有讀書聲
訪因師而師適詣余兩不相值

我去尋幽院師來訪小園休言不相見相見本無言
題張校理畫

寒色初凝野秋聲忽在林遙山不能見祇為晚烟深



題畫贈別

扁舟暮歸去別路江南樹
愁指楚山遥明朝望君處
龍門飛來峯

風吹峨眉雲東依北山住
我來不敢登只恐還飛去
待渡

渡子未回舟立傍沙頭樹
天寒雪欲來莫滯人歸去
送人遊湘中

離恨掛帆檣隨君遠入湘
飛花蕩春影江水不勝長

蔡村田家

田中耒聲歇煙火西林起獨立候歸人柴門夕陽裏
夢中作

悠悠衆擾去寂寂孤吟歇雨過滿窓涼高林上明月

駕鵞

兩兩蓮池上看如在錦機應知越女妬不敢近船飛

齋前芭蕉

靜遶綠陰行閒聽雨聲卧還有感秋詩窓前書葉破

韭

芽抽冒餘濕掩冉烟中縷幾夜故人來尋畦翦春雨

五塢山五首

飛泉塢

山空響更遠雨過流還急餘沫洒迴風一林紅樹濕

脩竹塢

色映溪沉沉秋雲生夕陰無限楚山意鶴鳴風滿林

丹霞塢

遙聞丹霞塢中有餐霞者絳綵發朝朝還同赤城下

白雲塢

雲開見山家雲合失山路聞語知有人欲尋已迷誤

芳桂塢

欲攀淮南樹人去山寂寞嫋嫋涼風生疎花月中落

卓筆峰

在天
平山

雲來初似墨鴈過還成字千載只書空山靈恨何事

師子林十二咏

錄六首



師子峯

風生百獸低欲吼空山夜疑是天目巖飛來此山下

吐月峯

四更棲鳥驚山白初上月起開東閣看正在雲峯缺

問梅閣

問春何處來春來在何許月墮花不言幽禽自相語

玉鑑池

一鏡寒光定微風吹不波更除荷芰影故取月明多

冰壺井

圓甃夏生冰光涵數星冷窓有定中僧休牽轆轤綆

脩竹谷

翠雨落經牀林鳩午鳴後笋出恐人來編籬遮谷口

楊基

新月

光斜鏡露邊影沒眉鋪黛香烟隔院來知有佳人拜

殘雪

庭雪半消殘猶存舊臘寒春風如有意留待隔年看

五色

五色繡羅衣花多枝葉稀春來不敢著怕引蝶雙飛

隔簾聽歌

低處最多情聲遲拍轉停坐中腸亦斷況乃隔簾聽

木芙蓉

江寒浦溆多舉目皆衰草惟有拒霜花遙遙隔江好

花開

花開醉不休
花謝莫深愁
縱使花常在
東風也白頭

題畫

泉爭亂石穿
松激回飈響
山經讀未終
猿啼孤月上

墨竹

烟樹忽縱橫
風葉屢偃仰
一榻卧山中
靜聽秋雨響

竹為僧賦

猿啼石澗幽
月出秋林靜
孤僧耿未眠
坐對蕭蕭影

柳塘春燕

花落燕飛交春風在柳梢玉樓皆繡幕高處莫安巢
笑巢

紅衣寒未脫綠葢晴猶卷楚女棹歌回遙遙楚江晚
彈琴高士

江靜月在水山空秋滿亭自彈還自罷初不要人聽
白雲泉

泠泠白雲泉流向白雲邊泉水流不斷白雲飛上天
夜坐

窓寒雪亂飛鴈帶邊聲過對影却增愁吹燈暗中坐

示楊水西

親遠更家貧將歸未有因相逢難說與君是故鄉人

長沙雜咏六首

花深衆禽寂格格啼山鷓鴣響一燈來人歸碧湘夜
東風吹小雨一夜滿瀟湘明月鷗波裏蘼蕪各自長
網得湘中魚穿向湘邊柳一逕入花陰來換長沙酒
寒沙竹塢深細雨烟江渺不聽野鶯啼那知是春曉

筠嶼烟長碧蘭坡水自香只宜行畫裏忘却在瀟湘
湘人愛樓居斜枕湘江起樓下倚闌人簪花照春水
西園梨花春晚開一枝

明日是清明孤花雪鬪輕不須開滿樹春少更多情
春盡又開一枝

深院閉青苔黃昏獨自來花應憐我意特放一枝開
春夢三首

春夢復春夢春夢有誰醒昨日梨花白今朝杏子青

春夢復春夢夢好不知春只有雙蝴蝶憐他夢裡人
春夢復春夢夢覺春無迹何處覓殘紅東南數峰碧

張羽

蘇小墳

冷落百花朝無人上畫橋東風吹綠草依舊似裙腰

蘭室詠

葉

泛露光偏亂含風影自斜俗人那解此看葉勝看花

花

能白更兼黃無人亦自芳寸心原不大容得許多香

徐賁

送朱知事

惆悵官亭酒如何送客頻尊前莫催別明日異鄉人

送呂庸南

雪色上征衣雲沙鴈自飛去家千萬里只解送人歸

劉崧

峭壁蘭

巖石下陰陰，猗蘭綠如翦。
花發人不知，秋香入苔蘚。
題李唐牧牛圖二首

天寒放牛遲，野曠風獵獵。
獨來長林下，吹火燒山葉。
日夕山氣昏，獨歸愁路遠。
猶戀草青青，遲回下長阪。

周湏

寫江岫春晴圖

汀洲碧草生，鳬鴈動春聲。
莫上高亭望，能傷送別情。

牛諒

紅梅

隴頭人未來江南春幾許惆悵玉簫聲吹落胭脂雨

吳雲

題周伯寧江山送別圖

江山天共遠無限別離人去長亭在空餘落鴈聲

吳琳

小景

茅屋掩芳林
蘿衣卧苔石
空山寂無人
寒雲落秋色

戈鎬

送陳伯淵教授歸沔陽

去買沔陽船
挂帆上秋水
別路折垂楊
歌聲斷腸起

周豈

新月

稍向天邊落
初從雲底生
徒然似鈎曲
能得幾時明

馬治

絕句

有弟天涯隔無人消息稀
何時比鴻鴈一道向南飛

陳汝言

雜詠

空庭清晝永花落見春暮
誰念未歸人草色江南路

張宣

題冷起敬山亭

石滑巖前雨茶香樹杪風
江山無限景都在一亭中

畫梧石

鳴琴罷瑤席鶴夢清宵警涼月下前除照見梧桐影

謝徽

禪窩

師子林十
二咏之三

陰壑寒猶悶空山響已沉白雲無路入禪向定中深

卧雲室

朝卧白雲東暮卧白雲西白雲長共我此地結幽栖

雲林竹

風葉響秋林煙梢帶夕陰美人離思遠湘水夜來深

錢宰

夜泊西江

綠樹如韋曲澄江似謝家暖雲巢燕子清露濕梨花

題畫菜二首

綠酒交春熟燈花入夜開兩畦堪小摘不見故人來
今日荷鋤倦嘉蔬沒四垣客來春酒綠風雨夜開園

秋江晚渡

落日歸棹緩滄江秋思加雙鱗上荷葉一鴈下蘋花

牧牛圖

野老春耕歇溪兒晚牧過夕陽牛背笛強似飯牛歌

葉子奇

徽嚴道中

經行古官道何處有人家時見荒山脚一川蕎麥花

題花木翎毛畫

海棠花未開枝上春禽語東風幾何時滿地飛紅雨

濛濛花上霧五月海榴紅幽禽哢晴晝葉底聽惺惚
寄履齋

鑿池取青天魚向天上游夜靜風不波一痕山月秋
胡奎

江邊柳

朝送木蘭船暮迎征馬鞭非關離別苦生長在江邊
管訥

江行三首

晚過三江口江空水急流船頭燈火起咫尺是黃州
野色含江薄沙痕帶水長東風無白浪容易下蘄陽
遠樹微茫裏江流浩蕩間舵樓烟雨重不見九華山
殷奎

絕句

霜落水禽啼寒流遶大隄長魚不受釣躍過石梁西

袁華

柳塘春

鴨綠波搖艦鵝黃柳覆堤飛花如白雪流出武陵溪

申屠衡

問梅閣

石闌護苔枝相對黃昏月問答本無言翠禽強饒舌

指柏軒

冰霜二百年老骨耐撐拄欲知僧臘高即是堦前樹

陳璧

題淨林寺壁

急澗無停流行雲那得定不息奔競心山林亦非靜

凌雲翰

題畫

山雨忽開霽溪流繞茅屋時有濯纓人雲端看飛瀑

王叔舟

三月三日雪應制

柳絮飛還早梅花落太遲天顏多喜色瑞氣滿瑤池

王紳

題黃侍中翠微書舍

屋頭有流水時作幽琴鳴掩卷欲細聽風移過前楹

趙迪

天鷲

飲啄渚田中栖薄蒹葭岸不與鳬鴈同飛鳴在雲漢

鷗鷖

朝浴湖水濱暮宿菰蒲裏偶值蕩舟人雙雙復飛起

殘雨

黃陵日已昏蕭颯涼颼起殘雨挂空江冥濛若千里
黃本

題江雪川長江圖

弋罷棹歌迴斜陽映衰柳何處最秋多湘南斷磯口
飛鴈帶秋來汀蘆風夕響曾恐釣違時扁舟送潮往

王彞

竹谷

幾曲轉逶迤月明人跡稀長林秋露落一天吠山扉

卧雲室

秋潭看月還片雨千山暝獨有鉢中龍蜿蜒伴僧定

指柏軒

行道出深樹空庭秋颯然風來人不見青子落僧前

問梅閣

窓間月色微薄雪自風吹誰得春消息南枝定北枝

徐尊生

畫馬

白馬被朱韉牽來過御前
憶曾何處見金水小橋邊

梁寅

初夏

樹暗雲更深鳥鳴春已去
多謝桃源人能留漁父住

韓奕

楞伽院

江左尚清談方外多高士
春山烟雨中半是禪棲地

王履

逢雲歸可愛

一朵歸雲靜徘徊正好看匆匆恐驚散不敢上林端

卞同

倪雲林畫

雲開見山高木落知風勁亭下不逢人斜陽淡秋影

呂不用

東山寺題樓壁

白雲幾曾散却作一樓貯明月夜夜來無人敢攜去

題送別圖

何處瞻衡宇
西江烟水村
彭郎磯上月
送汝到柴門

梁蘭

窓下

月落窓中暗
月來窓外明
夜深風弄影
疑是有人行

題紅梅

貞態由來白
輕紅故惱人
莫將桃李比
別是一枝春

逋祖

涉溪

晝涉溪猶淺暮行溪忽深水猶如此變安可測人心

方孝孺

枯木圖寄許士修

春到已多時幽禽尚未知上林無限好何事立枯枝

題山水

離家今幾載衣袂染京塵不敢看圖畫青山恐笑人

練子寧

罷直圖

草詔下金鑾宮槐白露寒紫駟驕不控明月在闌干

程本立

宿普安

漢婦良家子從軍歲月多生來小兒女唱得楚人歌

江頭絕句

小樹香櫟子疎籬扁豆花人情悲異土物色似吾家

胡閏

題畫松

幽人無俗懷寫此蒼龍骨
九天風雨來飛騰作神物

解縉

芙蓉

木末有芙蓉宛在水中汀
若向春風開無人看桃李

送人

落日照大堤花間聞馬嘶
城頭鼓角起相送午門西

早朝

驄馬五更寒披衣上繡鞍東華天未曉明月滿闌干

楊士奇

邳州城下夜雨

薄暮風色寒移舟宿前渚欹枕不成眠孤篷夜來雨

夜發清江口

日落烟水寒解纜清江渚中夜北風來相送潭州去

夾溝遇邑人問家信

聞道故鄉來離家今遠近恐有南京書停舟試相問

過谷亭

明月轉檣竿露下孤篷濕欲繫谷亭舟沙頭風正急

吳溥

自歎

去鄉三十年顏貌總非昔昨日鄉人來相看不相識

王達

題扇

葉暗前朝雨花飛昨夜風空山人不見春在綠陰中

王璩

雲林畫

羣樹葉初下
千山雲半收
空亭門不掩
禁得幾多秋

王偁

題美人撲蝶圖

為惜韶華去
春深出繡幃
撲將花底蝶
祇為妬雙飛

王恭

古鏡

寶鏡何年鑄龍紋積暗塵非關磨洗倦恐照白頭人

鷓鴣

綠樹殘春外雙飛錦翼齊長沙有遷客莫向雨中啼

曾榮

雨後即事

片片白鷗鳥看人隊隊飛沙頭莫相認與爾久忘機

王英

題楊補之墨梅圖二首

積雪園林暮春光獨滿枝玉人間對此清淡最相宜
斜月轉空齋風清畫角哀橫窓見疎影疑有暗香來

魏驥

三月三日雪晴寒甚早起偶成

起掃堦前雪寒猶臘盡時貂裘還再擁却負看花期

吳凱

題枯木竹石

古木封苔潤叢篁被雨滋空山無與伴相結歲寒期

新篁翳怪石古木晝陰陰我欲頻來此焚香一鼓琴

薛瑄

舟發辰溪岸

岸脚插江深洄潭搖石影舟行若天游妙處心獨領

秋夜

泠泠碧窓風皎皎疎簾月重門掩秋霜素練擣寒雪

荒迳

曉行荒迳中灩灩草上露日出雲氣收一鳥空中度

野市

野市二三家柴門倚水斜
溪童賣蒲笋歸路不辭賒
穆陵關夜雨

暝色來遠谷清風動華燭
山樓雨聲寒羅幃人獨宿

于謙

春寒

遠山猶帶雪淺水未生波
花柳無消息春寒可奈何

秋意

溽暑隨風散微涼趁雨生蕭蕭樹頭葉已解作秋聲

秋閨

深閨夜勝年刀尺如冰冷縫紉不成眠轆轤響金井

惜春

無計留春住從教去復來明年花更好只是老相催

春曉

晝靜暖風微簾垂客到稀畫梁雙燕子不敢傍人飛

春日登樓

柳條如翠線萬縷織春愁遮斷東風路無緣入畫樓

偶題

倦鳥投林處斜陽在樹枝薄雲收未盡山雨乍晴時

春夜

長風送華月照我庭前樹宿鳥忽驚飛雙雙背人去

劉球

山居

水抱孤村遠山通一徑斜不知深樹裏還住幾人家

張楷

金陵懷古

落日滄江雨東風廢苑春
莫言三國士猶勝六朝臣

平顯

光霽堂

碧雞翠瀉濛夕影到滇水
月出金馬東徘徊白雲裏

施敬

巴陽夜泊

獨棹三巴夜，秋高片月孤。
灘聲將客夢，萬里下東吳。

貧樂軒

長卷束牛腰，簞瓢繫牛角。
讀書深樹中，不知山日落。

鮑仁濟

絕句

月移階上花，露滴階下樹。
四顧寂無人，流螢自來去。

劉績

自題詩本

幼小工刺繡極知箴線難祗緣花樣古不耐入時看

錢遜

閨思

望斷傷春眼湘簾懶上鉤落花深院靜鸚鵡對人愁

韓永

詠梅次竹鄰

昔訪逋翁宅牆頭露半梢因吟暗香句行過段家橋

陸德蘊

富林春曉

旭日始啟旦鳥聲出烟蘿草堂檢春事花落風檐多
谿橋曉市

石梁雙跨谿虹影倒涵水斜月未墮烟烟中市聲起

吳高

黃洞山

惠陽十萬家采薪皆此處荷葉蓋頭歸知是前山雨

陳憲章

對菊

浙浙西風至為秋未有涯
江邊聊一醉信手得黃花
不落龍山帽何須九日風
更煩將小雨向晚洗花叢

贈鄺筠巢

山中一夜秋老屋居然別
丈人不飲酒共坐看明月

送劉宗信還增城

夜宿黃雲塢秋登碧玉樓
歸時一片石見月過羅浮
山到鐵橋西青天一角低
送君高處望天與帽簷齊

可怡亭

此地還成趣庭柯幾度攀
亭中人不見月照門前山
訪客舟中

船中酒多少船尾閣春沙
恰到溪窮處山山枳殼花

九日

霜前淡淡花瓢內深深酒
今日陶淵明廬山作重九

周鼎

月夜湖上

移舟烟水上吹笛藕花前
衣薄露如雨杯空月在天

冬夜

寶篆沉烟白銀屏燄燭紅
不知窓外雪撩亂撥春蟲

郭登

客中春晚

遠塞書難寄空庭花自開
舊巢雙燕子今歲不曾來

春日遊山偶成

林下扶藤杖溪邊整葛巾
春風莫相妬不是折花人

范澄

送別

酒盡津鼓喧風生浦帆亂山迴不見君夕陽在沙岸

童軒

春日卧病柬高仲顯一首

紅桃始破顏綠楊已堪把想應城南道日日多車馬

湖口夜泊

江水匯為澤瀾漫深萬丈山寺晚鳴鐘湖心明月上

小孤山

又俗呼為小姑

秀色真可餐
雲鬟不須理
江水濕羅衣
芙蓉滿身紫

采石懷李白

扁舟依采石
牛渚浩風波
不見錦袍客
滿篷涼月多

倚樓

愁倚溪樓望
還因見月明
月明如有約
偏照別離情

感興一首

芳草春來綠
閒花雨後紅
思君不能見
悵望畫樓東

李應禎

東禪寺

松杉滿院風豆莢一籬綠不聞車馬喧時有高人宿

謝績

東浦夜泊

日落潮生浦天空月上沙歸舟與飛鳥相趁入蘆花

張寧

南浦停雲

不見同心人相思渺雲樹記得別離時却在飛雲處

林良花鳥

竹樹晚淒淒天寒相傍棲春風疎雨歇飛上畫樓啼

丘濬

客中對月

萬里思歸客傷心對月華欲憑今夜影回照故園花

中秋有感

客裏逢秋景思鄉倍愴神依然今夜月不見去年人

題扇面小景寄鄉友

遠樹平連野微雲低度山黃龍青雀艦不似釣舟閒

湯肩勣

樵嶺

遲日轉輕陰驚風發疎冷何處斧丁丁千山白雲暝

蔣主忠

芙蓉

清露下林塘波光淨如洗中有弄珠人盈盈隔秋水

李東陽

吉安府

山勢西來斷江流北去平萬家深樹裏聞是吉州城

見月

野宿秋雲暝溪行曉霧寒歸心與明月夜夜到長安

西園秋雨詠苔

豈不愛佳客畏人踐我苔西園十日雨三徑不曾開

慈恩寺

水繞湖邊樹花垂石上藤長來寺前坐不識寺前僧

雜畫

種樹自何年幽人不知老不愛松色奇只聽松聲好
野樹兼天暝山鐘度水遲詩僧不出戶頭白少人知
入谷聽幽泉依稀隔雲注欲觀泉出時須向雲深處

謝鐸

桃溪

淺水難容櫂繁花自作村分明幽絕地不是武陵源

吳與弼

秋曉

風來夜枕寒雲生曉窓雨旅思共秋清遙思故山侶

道中作

微雨已滑途行客未堪住遙問讀書齋正在花深處

友人至

獨繞烟村來共茲玩雲月細語夜已闌深意殊未歇

縱步

幽花發清香芳林漲新綠聞聽山中禽更倚籬邊竹
宿黃茅潭隔港

日夕北風起停橈未有涯橫江欣得伴和月宿蘆花
大同峽

秀峙交翠屏清泠響寒玉谷鳥時一鳴蒼苔此幽獨
楊林橋

野水平橋路行行霽景開地名時記取他日或重來
弋陽道中

日短前途遠天寒問宿忙亂雲迷望眼細雨濕行裝

黃嵐坑

連山桃李開晴光爛如許寧知明日花不有今宵雨

宿湖頭

野濶雲爭暝江空雨未休問程須策馬燈火宿湖頭

俞誥

盼項文祥不至舟抵於陵夜泊

相去不百里相思愁萬重於陵城下泊夢斷五更鐘

張德政

送客

旅食正蕭條
況別知音者
空抱流水琴
獨立斜陽下

陳景融

答姚景升

露冷催砧杵
風高急鼓鼙
登樓回首處
目斷塞鴻西

劉珏

秋望

天迴黃雲斷林空古木疎
遙憐漢庭使千里寄邊書

魏時敏

休息軒

亭小貯琴聲池清蘸花影
曉日上窓紗幽人夢初醒

章珍

無題

溪橋春水生新蒲綠堪把
茅屋掩松雲斜陽鳥飛下

文洪

睡起

寂寞掩林扉東風晝方永睡起落紅多斜陽半樓影

黎擴

山茶

葉苦寒摧綠花愁雪妬紅自知榮適晚不敢恨春風

洞庭秋月

湖上清秋夜扁舟泛碧波紫簫吹不斷無奈月明何

王寬

解任歸書草萍驛


三月草萍驛風花點客衣
春山啼杜宇也道不如歸

張鎬

為李景陽題便面

萬樹落涼陰幽溪漾晴碧
山雨夜來多苔痕上磯石

御選明詩卷九十六



總校官庶吉士臣侍朝

校對官編修臣莫瞻菴

謄錄監生臣張搓